

Thursday, March 19, 2026

Time - 2:30pm - 2:35pm

AKASHVANI AIZAWL
REGIONAL NEWS UNIT

CM

Assam Ronpur-ah Thangram Indigenous Peoples Movement (TPIM) leh MZP General Headquarters tangkawpin an buatsaih Thangram Cultural Meet 2026 chu neih a ni a. Chief Minister Pu Lalduhoman he hun hi a hmanpui..

Kumin Thangram Cultural Meet hi a vawi hnihna a ni a, thupuiah, "Unau kan ni" tih chu hman a ni.

Thusawiin Chief Minister chuan, history ah chuan Cachar phaia khawsa hmasate chu Biate leh Hrangkhol te an ni a. Thangram pawh hi AD 1490 velah Ranglong, Sakechep, Hrangkhol, Molsom, Chorei leh Kaipeng hnamten an lo luah tawh a. British an lo lian a, an inkarah indonate a lo awm a. Vawiina Thangram ti a sawi Langkaih phai leh Singla phai mel 180 biala zau chu kum 1867 khan ramri kham fel tak neiin British leh kan pipute khan inremna an siam ta a ni a ti.

Ramriin dai dan mah se hnam ri chu kham theih a ni lova, ram hranah te, state hranah te awm mahse, unau nihna te, hnam khat nihna te uar taka lantir zel tur a ni a ti.

Chief Minister chuan inpumkhatna lama hmalakna kawngah Thangram mipuite an thawhhlawk hle a, Mizoram mipuite pawh an lawm hle a ni a ti a. Hnam huikhawmtu lian leh tangkai YMA te, MZP te leh kohhran te, tlawmngaipawl dangte kaltlangin nghet takin invawn tawn zel ni se a ti.

Tun hnaiah thenawma Zofate delh chin ramah harsatna a thleng hlawm a. Heng harsatna lo thleng te hi Pathian remruatna anga lo thleng, an thatna tura a rawn tirh a ni lovang tih sawi theih a ni lo a ti a. Engkim ti thei Pathianin hna a thawh chuan, theih loh reng reng a awm lo a ni a ti.

Thangram Indigenous Peoples Movement President Pu K. Vana Chorei, pawhin thusawiin, Mizoram Chief Minister meuhin a tlawh chu a ropui a, hetiang taka ram hruaitu lianin a tlawh an la hre ngai lo a ti a. An ram tana ni chhinchhiahtlak a tling a ti. Tunah chuan an chhehvela hnam dangte pawhin nu leh pa an nei a ni tih an hmuhpui ta a ti a. Mizoram mipuiten hetah an fate an awm a ni tih hrereng se a duh tih a sawi a ni.

Thangram tih hi Khawthlang ram tihna a ni a. Mizo thlang tla hmasate luah ram niin tunah hian khaw 24 vel leh mihring singthum vel an awm mek a. Heng rama cheng zo hnahtlak hnam parukte hian Thangram Indigenous Peoples Movement dinin kawng hrang hrangin hma an la mek a ni..



ECONOMIC SURVEY

Mizoramah sorkar leh mimal hnuaiia damlo enkawlina leh inentirna hmun 852 a awm a; heng zinga 161 hi Aizawl district-a mi niin a tam ber a, a tlem berna Hnahthial district-ah 37 a awm.

Planning & Programme Implementation department-in a buatsaih 'Economic Survey of Mizoram 2025-2026' in a tarlan dan chuan, Mizoramah sorkar leh mimal hnuaiia damlo enkawlina/inentirna 852 a awm a; he'ng zinga 408 hi sub-centre niin a tam ber a, clinic 322-in a dawt a ni.

Aizawl district-a damlo enkawlina/inentirna 161 hi District Hospital pahnih, Sub-District Hospital pakhat, community health centre (CHC) pali, primary health centre (PHC) panga, urban primary health centre paruk, sub-centre 83, tertiary care hospital pakhat, clinic 42 leh private hospital 17 an ni.

Mizorama damlo enkawlina leh inentirna hmun tlem berna Hnahthial district-ah hian District Hospital pakhat, PHC panga, sub-centre 16 leh clinic 15 awmin, a vaiin 37 a ni.



SOCIAL WELFARE

Social Welfare Department leh Spastic Society of Mizoram (SSM) tangkawp chuan Dawrpui Multipurpose Centre ah, fate zinga rilru leh pianphunga harsatna nei nu leh pate tana inzirtirna hun 'Sensitization Workshop for Parents of Children with Special Needs' an buatsaih a.

He hun hmanpuitu Social Welfare Women & Child Development Department Secy Pi Lalzarmawii chuan thusawiin, Fate zinga rilru leh pianphunga harsatna nei nu leh pate dinhmun chu eng emaw chang chuan harsa tak a nih tur thu sawiin, beidawng mai lo leh kawng awm ang angte dap zel thei tura inhrilhhriatna neih chu tihmakmawh a nih thu a tar lang a. Nu leh pate chu an rawngbawlina an ko a tla hlen kawngah theihtawp chhuah zel tura fuihin, fanau ro chan malsawmna an dawnte chhiar thiam a, an fate enkawldan tur inzirtirna hun chu hlawkpui ngei tum tlat turin duhsakna a hlan nghal bawk a ni.

Vawiina Sensitization Workshop ah hian Mizorama Special School leh Centre hrang hrang atangin Rualbanlo fa nei nu leh pa kalkhawm ten nitin khawsak na kawnga buaina leh harsatna hrang hrang an hmachhawn thinte, an fate harsatna avanga zirna in leh khawtlang nun bakah, chhungkua leh kohhrana harsatna an tawh thinte sawi hovin, mithiamte nen hmalakho dan tur leh an fate enkawl zeldan tur zirhona hun an nei a ni.

